

# Txirritola

ARAMAIO / Barikua / 2004ko maiatzaren 28a / 110. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Santikurtz Eguna izango da datorren domekan

UBANE MADERA

Ekaineko aurreneko astebururekin batera Santikurtz Eguna ospatzeko eguna iritsi da. Antolatzaileek ipini duten baldintza bakarra da oinez igo beharra dagoela.

Ekainaren 6an, domeka, ospatuko dute Arangioko Atxetan dagoen Santikurtz ermitako jaiak. 12:00etan da hitzordua, ermitan bertan. Hala, lehenengo meza santua esango dute, eguerdian, eta horren ostean salda eta txorizoa banatuko dute Santikurtzera doazen artean. Horren ostean, erromeria izango da, herriko trikitilariak girotuta. Eta eguraldiak lagunduz gero, askok arratsaldea ere aprobeztatuko dute Santikurtzen gelditzeko.

### OINEZ IGOTZEA, DERRIGORREZKOA

Arexolako eta Arriolako gazteak antolatu du Santikurtz Eguna. Edozeinek parte har dezake egun horretan, baina baldintza



ORIXOL MENDI ELKARTEA

Besteak beste, salda eta txorizoa banatuko dute Santikurtzera doazen artean.

bat ipini dute antolatzaileek: automobila San Kristobalen lagatzea eta oinez igotzea. Diote asko jota ordubeteko bidea dagoela Santikurtzeraino eta ez

dela zaila bidea oinez egitea; hori bai, eguzkiak jotzen badu txapela eramatea gomendatzen dute, bideko pinuak moztuta daude-eta.



### Itxura berritua du Barajuengo elizak

Barajuengo eliza orain dela gutxi berritu dutela jakinarazi digu Barajuengo auzo-alkateak. Besteak beste, margotu egin dute eliza, elektrizitate kontuak konpondu egin dituzte eta bestelako konponketa txikiak ere egin dituzte. Elektrizitate kontuetan, besteak beste, elizako eta erretaulako argiztapena berritu egin dute. Eta lan txikien artean, adibidez, korura igotzeko balastradaren egurra konpondu egin dute eta lurrari berniz modukoa eman diote. Gainera, parrokoak kontatu digu asmoa dela aurrera begira, besteak beste, elizpea margotzea. Jakinarazi digunez, auzolan handia egin dute elizari itxura berria emateko. Dirua auzokoen eta Elizaren artean ipini dute. /U.M.

## Oraindik ez da inor azaldu Bañeraz arduratzeko

UBANE MADERA

Bañera elkarteok jakinarazi digute oraindik ez dela inor azaldu Bañera elkarteaz arduratzeko asmoarekin. Gogoratu beharra dago maiatzaren 31 ipini zutela izena emateko epe muga moduan. Edozelan ere, herritar batzuek interesa erakutsi dutela esan digute.

Bañera elkarteok taldeek bukatu dute aurtengo denboraldia. Neskek joan den asteburuan bukatu zuten, eta mutilek bihar partiduarekin bukatuko dute liga txapelketa; Diocesanas Nieves Cano taldearen kontra jokatuko dute, 11:00etan, Aramaion. Aurreko partiduaren gainean, berriz, binako berdinketa lortu zuten Bañerako mutilek Kanpezuko Santa Cruz taldearen kontra. Eta esan beharra dago bihar partidua galdu arren, mutilek taldeak kadete mailako aurreneko postua irabazi duela aurtengo jardunaldian; gainera, bigarrenari hamar puntu baino gehia-

goko aldea atera diote. Neskek, berriz, bosgarren postua eskuratu dute.

### AGUR BAZKARIA

Hala, denboraldia bukatu dela-eta, bazkaria egingo dute bihar Bañera elkarteok jokalariek, entrenatzaileek eta zuzendaritzako taldeak. 20 bat lagun elkartuko dira Dukiena jatetxean. Gainera, denboraldiko ohiko agur bazkaria baino gehiago izango da bihar; izan ere, orain arte Bañera elkartearen zuzendaritzaz arduratu direnek, Josu Bideburu eta Alfonso del Campok, orain arteko jarduna utzi egingo dute.

Horrekin lotuta, esan beharra dago oraindik inork ez duela izenik eman Bañera elkarteaz arduratzeko. Zenbait herritarrek interesa azaldu dutela esan digute, baina oraindik ez dutela ardurarik hartu. Zuzendaritzak maiatzaren 31ra arteko epe muga ezarri zuen arduradun talde berria sortzeko. Hortaz, Bañera elkarteak desagertzeko zorian segitzen du. Ea, bada, datorren astean albiste hoberik ekartzerik dugun.

## Zuiako Koadrilako Emakumeen Topaketak

U.M.

Gaur bukatu da Zuiako Koadrilako Emakumeen Topaketarako izena emateko epea. Datorren ekainaren 11n ospatuko dute aurtengo jaiak. Murgian izango da, 16:00etan hasi eta 20:30ak arte. Ekimenaren helburua Zuiako Koadrilako emakumeen arteko harremana bultzatzea da.

Iaz Aramaion egin zituzten Zuiako Koadrilako Emakumeen Topaketak. Emakume mordoak joan ziren Aramaiora. Normalean, halako topaketetan inguruko herrietako emakume dezentek parte hartzeko ohitura du, euren arteko harremanak sakontzen laguntzen dielako.

Aurten, Murgian ospatuko dituzte topaketak. Dagoeneko

zehaztu dute jaiko egitaraua, bestelako urteetan egiten dutenaren antzerakoa. Aurtengo jardunaldiari *Emakumeak etorkizunerantz begira* izena ipini diote.

### ILUNTZERA ARTE

Arratsaldean hasiko da jaiak, 16:00etan. Aramaiotik 15:00etan aterako da autobusa, eskolatik. Hala, Murgiara iristen direnean, ongietorria egingo diete emakume guztiei eta horren ostean, besteak beste, mahai-ingurua izango dute. Emakumeek egingako lan ekimenen gainean berba egingo dute. Gero, Panico Esceñico Antzerkia taldeak *Solas* antzezlanaren eszenaratuko du. Kafea hartuko dute antzerkiaren ostean, bide batez tertulia ere egingo dute, eta horren ostean amaiera emango diote aurtengo jardunaldiari, 20:30ak inguruan.



## TELEFONO JAKINGARRIAK

| OSASUNA / LARRIALDIK      |              |
|---------------------------|--------------|
| Osasun etxea (txandak)    | 945 44 53 40 |
| Botika                    | 945 44 50 03 |
| Udaletxea                 | 945 44 50 16 |
| Ertzaintza (Arrasate)     | 943 79 71 99 |
| Gurutze Gorria (Legutio)  | 945 45 52 52 |
| San Martin Eskola         | 945 44 50 04 |
| Taxia eta autobusak       | 945 44 50 33 |
| Udal kiroldegia           | 945 44 53 35 |
| Postetxea                 | 945 44 50 83 |
| Zulako Eskualdea          | 945 43 01 67 |
| Suhiltzaileak (Zubillaga) | 943 78 28 00 |

## AUTOBUSORDUTEGIA

| ARRASATE | ARAMAIO | GASTEIZ |
|----------|---------|---------|
| 07:00    | 07:15   | 08:00   |
| 10:00*   | 10:15   |         |
| 11:00    | 11:15   |         |
| 12:00*   | 12:15*  | 13:00   |
| 15:15    | 15:30   | 16:15   |
| 17:20    | 17:35   |         |
| 18:30*   | 18:45   |         |
| 20:30    | 20:45   | 21:25   |
| 21:00*   | 21:15   |         |

  

| GASTEIZ | ARAMAIO | ARRASATE |
|---------|---------|----------|
|         | 07:50   | 08:05    |
| 08:15   | 09:00   | 09:15    |
|         | 10:15*  | 10:30    |
|         | 11:15   | 11:30    |
| 13:10   | 13:55   | 14:10    |
| 16:20   | 17:05   | 17:20    |
|         | 17:35   | 17:50    |
|         | 18:45*  | 19:00    |
| 19:30   | 20:00   | 20:15    |

**OHARRA:** izartxoak duten orduetan eskaeraren araberako zerbitzua eskaintzen dute. Auzotako bizilagunei zuzendutakoak da, eta autobusa erabili gura badute, bezperan deitu beharko dute honako zenbaki honetara: 629 54 59 23

## OHARRAK

## BARIKUKO ZINEMA

Oraingo honetan, Wolfgang Beckerren *Good bye, Lenin* filma emango dute. Komunismoaren gainbeheraren gaineko komedia da, sari asko dituen filma.

## DOMEKAKO ZINEMA

*Spy Kids II* filma emango dute. Abenturazkoa da, umeendako, apur bat fantastikoa. Bestalde, gogoratu beharra dago oraingo film hori izango dela azkena. Ohiturari jarraituz, ekainean ez dute filmik emango. Eta, berez, uztailean udako zinema ematen hasi beharko lukete. Baina oraindik ez da segurua udako zinema egongo denik. Zerbitzu hori eta herriko beste lan batzuk egiten dituen enpresari bukatu egin zaio-eta kontratua. Orain, lan horiek egiteko deialdi publikoak deitu du Udalak; hortaz, ez dago esaterik zein jarraipen izango duen udako zinemak.

## BERTSO SAIOA

Kanpezun jardungo du gaur, barikua, Manex Agirrek beste bost bertsolariarekin batera. 22:00etan hasiko da afaria, kultura etxean.

# Antolatzaileak pozik daude esaera zaharren bertso lehiaketarekin

UBANE MADERA

**Balorazio ona egin dute Txirritola Euskara Elkarteok esaera zaharren bertso lehiaketaren gainean. Eta esan digute dagoeneko datorren urtekoan pentsatzen dabiltzala, eta bigarren hori aurtengoa baino hobeto aterako den esperantza dutela.**

Izan ere, berritasun handia izan da esaera zaharren bertso lehiaketa. Horren ondorioz, besteak beste, bati baino gehiagori zaila egin zitzaion esaera egokia aukeratzea, ehun esaerarekin osatutako zerrenda batetik aukeratu behar izan zuten. Bi taldetan banatu ziren lehiakideak: gazteak eta beterranoak. Azkenean, beterranoek gazteei aurre hartzea lortu zuten, hori bai, alde txikiarekin.

## DATORREN URTEAN, HOBETO

Antolatzaileek kontatu digutenez, 15 bat lagunek ekin zioten lehiaketari, baina, bukaera aldera, lagun gehiagok bat egin zuten



Datorren urtean berriro antolatuko du ekimena Txirritola Euskara Elkarteak, baina Aramaioko esaera zaharrekin.

lehiakideekin. Oro har, oso ekimen alai eta polita izan dela uste dute Txirritola Euskara Elkarteok, eta dagoeneko erabaki dute

datorren urtean lehiaketa berriro egitea. Hori bai, aurtengo esperientziak lagunduta, datorren urtekoa hobeto egingo duten espe-

ranta dute. Besteak beste, ideia bertara egokitu eta Aramaioko esaera zaharrak erabiltzea da euren asmoa.

## BOTEPRONTOAN/ Lourdes Gardoki · Barajuengo auzo alkatea

### “Egundokoa litzateke Udalak Torralde mendiko pinudia erosi eta han parke bat egingo balu”

**A**uzo alkate berriak ditugu herrian joan den iraila ezkerro. Hala, gutxitan bada ere, zenbaitetan Aramaioko auzoei protagonismo apurtxo bat ematearren, asmoa da auzo alkate guztiak egotea eta bide batez auzoaren berri izatea. Oraingo honetan, Barajuenera jo dugu, Lourdes Gardoki da hango auzo alkatea:

## Nongoa zara, Lourdes?

Barajuengo auzoko Erdaide baserrikoa; bertan jaioetakoa, hain zuzen ere.

## Auzo alkate zaren lehenengo aldia da?

Bai, iraila ezkerro naiz alkate. Uste dut lau urterako dela.

## Barajuengen alkatea aukeratu egiten duzue?

Bai, boto-paperak elkartera eramaten dira, eta gehien lortu dituenak irabazten du.

## Herriko alkatea emakumea dela eta auzokoa ere bai...?

Horregatik izan zen, bai. Guk berarekin berba egiteko eta gauzak eskatzeko konfiantza handiagoa dugula-eta esan zuten auzotarrek andre bati emango ziotela botoa (barreak).

## Honezker auzoko beharren berri-eta izango duzue...

Hemen garrantzitsuenak eginda daude: ura, saneamendua... Baina nire ustez badago arazo



“Gure artean ondo konpontzen gara; eta etorri diren auzokide berriekin ere ondo konpontzen gara”

bat: argia. Iluminazio handiagoa behar du auzoak. Toki batzuetan falta egiten dute kale-argiek. Hori Udalarari eskatu genion, eta Foru Planean sartuta dago, espero dugu auzorako hiruzpatalu kale-argi ematea. Eta horrez gainera, garrantzitsua da baita ere Bentamotz baserriarendako edateko ura sartzea. Hori ere Foru Planean dago sartuta, eta espero dugu hori ere emango dutela. Eta bestela, ez dago gauza askorik; obra txikitxoak daude: iturri bat konpondu, elizara igotzeko hesi bat ipini (hori dagoeneko ekarrita dute), kanposantuko barruko atea konpondu (hori ere egiteko dago)... Eta gero bide bazterrak garbitzea falta da, baina hori auzo lanean egin behar dugu. Diputazioa aurreneko baserri-raino iristen da eta gainerako zatia Udalak egiten du, baina

“Iparralde taberna pareko paretan hesia ipintzea falta da, arriskutsu dago auto eta umeendako”

aurten ez dakit zer gertatu den. Hortaz, guk egin beharko dugu. Eta gero, oso-oso ona izango litzateke pilotalekua estaliko balute. Jende piloia etortzen da, eta, jakina, euria denean ezin da erabili. Eta benetan, udan jende mordoak ibiltzen da pilotan.

## Auzokoak?

Ez. Hemengoak eta kanpokoak, denetarik etortzen da. Eta gero, beste gauza bat oso polita izango litzatekeena da hau atzealdeko mendi hau, Torralde mendia, bada, hor dagoen pinudia erosi eta Udalak parke bat egitea. Hori egundokoa izango litzateke.

## Hori zure burutazioa da ala auzotarren eskaera bat?

Uste dut auzoko guztiak leudekeela ados. Aramaioko erdi-erdian dagoen punturik altuena da. Oso polita. Sasoi baten, auzoko jaietako egun batean, bazen ohitura jana hartu eta Torralde-ira igotzeko. Orain ere, parkea ipintzen badute, antolatuko dugu jaiegunen bat (barreak). Hortaz, berez, jendea etortzen da Barajuenera, ezta?

Bai. Pilotalekura, taberna ere badago, elkarteak beteta egoten da, udan bereziki... Eta pasealeku polita ere bada. Untzillatik, Zabolatik eta Azkoagatik etortzen dira... Maiatzetik hasi eta irail-urrira arte.